

65. RÁMAS gemmæ, in corde collocatæ, contactu oculos claudens, amatae amplexus voluptatem percepit, mammas illius non tangens.

66. RÁMAS, nuntio de uxore audito, cum illa congredi cupiens, magnum oceanum, quo *Lanka* circumfluitur, fossæ instar exiguum putabat.

67. Profectus est ad hostium necem, simiorum exercitibus sequentibus, neque solum in terræ dorso, sed etiam per aera catervatim incedentibus.

68. Ad illum, in oceani litore considentem, pervenit VIBHÍSHANAS, missus quasi per amorem a *Rákshasorum* Fortuna, quæ hoc consilium ei iniecerat.

69. Cui RAGHUIDES *Rákshasorum* imperium pollicebatur: etenim morum præcepta, justo tempore exercita, fructum producunt.

70. Ille in oceano salso pontem strui curavit per simios, similem SESHÆ, e regionibus infernis emergenti ad VISHNUIS somnum.

71. Per hanc viam transgressus, *Lankam* urbem obsedit simiis fulvis, alterum vallum aureum quasi efficientibus.

72. Prælium ibi oriebatur terribile inter simios et *Rákshasos*, RÁMÆ æque ac RÁVANÆ victoriæ clamore plagas feriente.

73. Clavæ diffringebantur arboribus, mallei contundebantur lapidibus, unguium lacerationes ipsas sagittas superabant, elephanti saxis elidebantur.

74. Tum SÍTAM, quæ RÁMÆ caput findi videns animo linquebatur, TRIJATA in vitam revocavit, illusionem id esse docens.

75. "Vivit dominus meus!" Ita exclamans illa libenter dolorem abiecit; antea vero, ejus mortem veram esse putans, "ego superstes sum!" ita cogitans pudore confusa erat.

76. Brevis DASARATHIDARUM afflictio, cum laqueus, a MEGHANÁDA iis injectus, GARUDA advolante dissolveretur, erat, ac si in somnio iis accidisset.

77. Tum RÁVANAS hasta LAKSHMANAM in pectore vulneravit, RÁMAS vero, quamquam non percussus, cor dolore laceratum habuit.

78. LAKSHMANAS vero, dolore levato per herbam, ab HANUMANTE allatam, denuo sagittis suis *Lankæ* mulieres lamentari docebat.